

DISSIDIUM

522

ANGLICANVM

De


PRIMATV

REGIS,

CVM BREVI PRÆ-  
*fatione ad Catholicos in An-  
glia degentes.*

AUTHORE,

MARTINO BECANO SO-  
cietatis IESV Theologo & Pro-  
fessore ordinario.



M O G V N T I A E

Ex officina typographica Ioannis Albini.

Anno M. DCXII.





# PRÆFATIO

AD

Catholicos in Anglia.

**S** Aluete Illustris-  
simi Domini;  
inuietissimi Ath-  
leta. Ad vos ve-  
nio, interpellandi causâ. Si  
molestum non est, audite me  
paucis; non diu vos tenebo.  
Ante biennium scripsi duos  
libellos de Primatu Regio: al-  
terum contra Apologiam &  
Monitoriam Prefationem

A 2 Serē-



4 PRÆFATIO.

Serenissimi & Potentissimi  
 Jacobi, Magnæ Britannie  
 Regis: alterum contra Tor-  
 turam Torti, seu, contra Sa-  
 cellanum Regis. Agré hoc  
 tulerunt Academici vestri;  
 & confestim, in causa Regia,  
 bellum mihi indixerunt. Hi  
 præsertim, Guilielmus Too-  
 ker, Richardus Thomsonius,  
 Robertus Burhillus, Henri-  
 cus Salcolbrigiensis. Nec de-  
 fugio. Quin multa sunt, quæ  
 mereddant alacriorem. Pri-  
 mum, causa equitas. Tum,  
 vestra fides, & constantia.  
 Denique, Aduersariorum  
 inter se dissidia, & intestina  
 dissen-

*dissensiones. De causa, quam  
defensurus sum, æquitate,  
quid attinet dicere? Pugna-  
turus sum pro Ecclesia Chri-  
sti, pro honore & obedientia  
Præsulum, pro Maiorum ex-  
emplo & consuetudine. Et  
hic, quenquam extimescam?  
Jam, vestra fides & constan-  
tia, quam quotidiani carce-  
res, vincula, supplicia, mortes  
pro Christo obita, toti orbi te-  
statissimam faciunt, cui tor-  
porem non excutiat? cui cal-  
car & animum non addat?  
Verè de vobis usurpare pos-  
sum illud ex Apostolo: Spe-  
ctaculum facti estis D E O,*

Angelis & hominibus. Deo,  
qui intuetur vestra certamina;  
qui vires suppeditat ad  
victoriam, & coronā præpara-  
rat ad triumphum. Angelis,  
qui mirantur, vos in carne  
fragili, potentissimos inferiorū  
Principatus non formidare:  
& simul gaudent, tam glorio-  
sos pugiles, suæ custodiæ com-  
missos esse. Hominibus, qui to-  
to orbe diffusi, vestro exemplo,  
vestra virtute & patientia,  
ad similia certamina, pro  
Christo subeunda, vehemēter  
accenduntur. Porro, dissidia  
adversariorum inter se tanta  
sunt, tamq̃ distracta ac dissi-  
pata



patæ eorum vires, ut magnopere metuendos esse non putem. Si nescitis, hunc libellum vobis offero. dedicoq; in quo, quibus in capitibus ipsi dissentiant, sigillatim explicatū est. Eum, si vacat, legite, & benè de euentu sperate. Interea ad pugnam me parabo; & cū tempus aduenerit, Spectatores vos esse cupio. Valete, & meam interpellationem equi boniq; consulite. Moguntia, mense Nouembri, anno 1611.

Vestri amantissimus

Martinus Becanus.



DISSIDIVM ANGLI-  
CANVM,

*De*

PRIMATV  
REGIO.

**P**RIMATVS REGIVS  
in Ecclesia Anglicana,  
res noua est. Ortum ha-  
buit sub Henrico Octa-  
uo : floruit sub Edouardo Sexto &  
Elisabetha : nunc, sub Iacobo, tot  
diffidiis domesticis laceratur & dis-  
cerpitur, vt diu stare non possit. Re-  
ctè Christus in Euangelio : *Omne re-  
gnum in se diuisum desolabitur*. Porro,  
quæ & quanta sint illa diffidia, in  
his paucis Quæstionibus demon-  
strandum est:

*I. An*



- I. *An Rex Angliæ habeat aliquem Primatum in Ecclesia?*
- II. *An primatus ille sit Ecclesiasticus & spiritalis?*
- III. *An Rex ab eo Primatu possit vocari Primas Ecclesiæ?*
- IV. *An ab eodem vocari possit supremum caput Ecclesiæ?*
- V. *An primatus ille consistat in aliqua potestate vel iurisdictione Ecclesiastica?*
- VI. *An Rex, ratione sui Primatus possit indicare*  
Conci-

*Concilia, & in iis præ-  
sidere?*

*VII. An possit leges ecclesia-  
sticas condere?*

*VIII. An beneficia ecclesiasti-  
ca conferre?*

*IX. An Episcopos creare &  
deponere?*

*X. An contumaces excom-  
municare?*


*XI. An iudicem controuer-  
siarum agere?*

*XII. Vnde Rex habeat su-  
um Primatum?*


*XIII. An subditos possit coge-  
re ad iuramentum  
Primatus?*

In his Quæstionibus extremè  
dissentiant Aduersarii. Sunt autem  
hi ferè

hi ferè. Sacellanus in *Tortura Torti*,  
Guilielmus Tooker Decanus Li-  
cheteldensis in *Duello, seu singulari*  
*certamine cum Martino Becano*. Rich-  
ardus Thomsonius in *Elencho Refu-*  
*tationis Tortura Torti*. Robertus  
Burhillus in *Responsione pro Tortura*  
*Torti*. Henricus Salcolbrigiensis in  
*Refutatione Examinis Becanici*. Præ-  
ter hos citabo etiam Nicolaum San-  
derum de *Schismate Anglicano*, Ge-  
nebrardum in *Chronologia*. Polydo-  
rum Virgilium in *Historia Anglicana*,  
Iacobum Augustum Thuanum in  
*Libris Historiarum sui temporis*. Cal-  
vinum in *Commentario supra Pro-*  
*phetam Amos*. Et si qui  
alii sint.







## I. QVÆSTIO.

*An Rex Angliæ habeat aliquem primatum in Ecclesia.*

I. **P**rimum dissidium est de nomine *Primatus*. Pleriq; admittunt hoc nomen. At Richardus Thomsonius malit *Suprematum*, quàm *Primatum* appellare. Ratio ipsius est, quia *Primatus* significat potestatem eiusdem ordinis : at Rex in Ecclesia Anglicana non habet potestatem eiusdem ordinis cum Episcopis & Pastoribus, sed altioris ac diuersi ordinis. Ergo non habet *Primatum*, sed *Suprematum*. Verba Thomsonii, pag. 33. sunt hæc: *Nos in Anglica nostro idiomate belliores longè sumus, quàm per inopiam Latini sermonis nobis Latine esse licuit. Non enim dicimus, The Kings Primacie, Regis Primatum, sed, The Kings Supremacie, Regis Suprematum. Quo vocabulo nos quoque deinceps utemur. Multum enim differunt Primatum & Suprematus. Illud enim potestatem eiusdem*

*eiusdem ordinis videtur significare, hoc non item.*

II. Hinc duo colligimus. Vnum est, omnes Anglos, qui vtuntur nomine Primatus, vel errare, vel improprie loqui, si Thomsonio credimus. Nam si proprie loquuntur, cum Primatus proprie significet potestatem eiusdem ordinis, planè sentiunt, Regem habere potestatem eiusdem ordinis cum Episcopis & Prælati Ecclesiæ. At hic, iuxta Thomsonium, error est. Vel igitur errant, vel improprie loquuntur.

III. Alterum est, de re significata coniecturam sumi posse ex voce significante. Vox *Suprematus*, noua & nuper inuenta est; incognita antiquis Patribus; inusitata in Scripturis; orbi Christiano inaudita. Quid porro significat? Supremam potestatem Regis in Ecclesia. Et hæc igitur noua est. Sanè, si antiqui Patres, tam Latini, quàm Græci, agnouissent hanc potestatem, reperissent aliquod saltem vocabulum, quo eam proprie expressissent. Id verò à nemine factum est.





## II. QVÆSTIO.

*An Primatus ille, quem Rex  
habet in Ecclesia, sit Ec-  
clesiasticus & spiri-  
tualis?*

I. **H**oc alterum dissidium est. Sub Henrico & Edouardo, semper appellatus est Primatus Ecclesiasticus & spiritualis, ut patet ex Sanderò, qui sic habet: *Calvinus Henrici Primatum Ecclesiasticum oppugnavit. Item; Episcopus Rossensis, quod Henrici Primatum Ecclesiasticum nollet confiteri, ad mortem producit. Item; Multi in custodiis propter negatum Ecclesiasticum Regis Primatum detenti. Item: Henricus mandavit, ut filius in fide Catholica educaretur, excepto Primatus Ecclesiastici titulo, quem ei reliquit. Item: Stephanus Vintonensis, Edmundus Londinensis, Cuthbertus Dunelmensis, Nicolaus Vigorniensis, & Dainus Cicestrensis Episcopi, timide resisterunt pueri Regis Primatui spirituali: imò simpliciter subscripserunt.*

II. Sub



II. Sub Maria, quæ Edouardo fratri successit, sublatuſ est hic tituluſ in Comitibꝫ Londinenſibꝫ, vt teſtatur Iacobuſ Thuanuſ libro 9. hiftoriarum ſui temporis, hiſ verbis : *Antiquatuſ iſdem Comitibꝫ, Primatuſ Eccleſiaſtici tituluſ.* At ſub Eliſabetha iterum reſtitutuſ eſt, vt refert idem author libro 15.


III. Hoc tempore, ſub Iacobo, in controuerſiam vocatur. Aliqui non audent appellare Primatuſ Eccleſiaſticuſ & ſpiritualeſ, ſed, Primatuſ quoad eccleſiaſtica & ſpiritualia. Inter quōſ eſt Sacellanuſ Regiſ in Tortura Torti, pag. 90. ubi ſic habet : *Neque verò, quoad ſpiritualia, aliud nos Regi Primatuſ tribuimus, neque quoad temporalia aliud Pontifici detrahimus, quàm debemus. Prior ille Regibuſ omni iure; poſterior hic Pontifici, nullo iure debetur.* Ego, cū primuſ legerem hæc verba Sacellani, putabam illum pro eodem uſurpare hæc duo, *Primatuſ ſpiritualiſ, & Primatuſ quoad ſpiritualia.* Et ſimiliter hæc duo, *Primatuſ temporalis, & Primatuſ quoad temporalia.* At deſenſoreſ & interpreteſ Sacellani, Thomſoniuſ & Burhilluſ, aliter ſentiunt. Sic enim de hac re ſcribit Burhilluſ, pag. 55. *Non dicit (Sacellanuſ) Primatuſ ſpiritualeſ, ſed Primatuſ quoad ſpiritualia, deberi Regibuſ omni iure.*

*iure.* Et pag. 133. in fine: *Et si enim Regi tribuimus Primatum in Ecclesiam, non tamen Primatum spiritualem aut ecclesiasticum ei tribuimus, sed potius Primatum quoad res & personas spirituales & ecclesiasticas.* Et Thomsonius, pag. 31. *Non dixit (Sacellanus) Primatum ecclesiasticum aut spiritualem, quasi formaliter intelligat; sed quoad spiritualia, id est, obiectivè & materialiter.* Quo sensu idem author, pag. 95. ait: *Diximus Regem gubernare quidem Ecclesiastica, sed non Ecclesiasticè.*

IV. Igitur, si quæras in Anglia, an Rex habeat Primatum Ecclesiasticum, nec ne? Respondebitur hoc modo: Henricus, Edouardus & Elisabetha habuerunt Primatum Ecclesiasticum; Iacobus non habet Ecclesiasticum, sed solum, quoad Ecclesiastica. Ergone minus hic habet, quàm illi habuerunt? Sic apparet. Ergone tam brevi interuallo accisus & imminutus est Primatus Regis in Anglia? Ita aiunt. Ergone prope interitum est? Non dubito. Quid causæ? Audi ex triuio: *Quod citò fit, citò perit.* Audi ex sacro Codice: *Si est ex hominibus consilium hoc aut opus, dissoluetur, Actor.*

5.38.

III. QVÆ-



## III. QVÆSTIO.

*An Rex ab hoc Primatu possit vocari Primas Ecclesie?*

I. **H**enricus Salcolbrigienfis simpliciter affirmat. Sic enim scribit pag. 140. *Dico Regem Anglia, Ecclesie Anglicanae Primatem esse.* Imò, tam certum ac indubitatum hoc esse vult, vt putet peccare contra publicam professionem Anglicanam, qui id neget. Nam pag. 177. sic habet: *Anglia Regem, Anglicana Ecclesie Primatem esse, in professione publica Anglicana veritatis sacris literis nixæ ponitur.*

II. Tookerus & Burhillus simpliciter negant. Sic enim habet Tookerus pag. 3. *Olere autem malitiam, ac clamitare audaciam tuam illud videtur, cum Regem Caput Ecclesie Primatemq; confingas.* Et Burhillus pag. 133. *Nec Primatem quidem omnino Regem nostrum dicimus; multò verò minus Primatem Ecclesiasticum.*

III. Hinc formo duplex argumentum:

B

Alte




Alterum ex Tookero, in hunc modum; Qui dicit, Regem esse Primatem Ecclesiæ, audax & malitiosus est. At Henricus Salcolbrigienſis dicit, Regem esse Primatem Ecclesiæ. Ergo audax & malitiosus est. Alterum ex Henrico, hoc modo: Qui negat, Regem esse Primatem Ecclesiæ, peccat contra publicam professionem veritatis in Anglia receptæ. At Tookerus negat Regem esse Primatem Ecclesiæ. Ergo peccat contra publicam professionem veritatis in Anglia receptæ. Nimirum, sic mulus mulum scabit.

I V. Sed quæri potest, uter rectius sentiat in hac re, Salcolbrigienſis, qui affirmat, Regem esse Primatem Ecclesiæ; an Tookerus, qui negat? Hæc lis pendet ex alia quæstione, an scilicet hæc duo nomina, *Primas*, & *Primatus*, sint necessario connexa seu coniugata? Salcolbrigienſis putat, necessario connexa esse. Igitur, quia semel dixit, Regem habere Primatum Ecclesiæ, consequenter affirmat, Regem esse Primatem Ecclesiæ. Valet enim apud ipsum, hoc argumentum à coniugatis: *Rex habet Primatum. Ergo, Rex Primas est.* Sicut & istud: *Sacellanus habet Episcopatum. Ergo Episcopus est.*

V. Tookerus contra sentit. Nam pagina 6.

na 6. disertè ait , Regem habere quidem Primatum Ecclesiæ ; non tamen esse Primatem Ecclesiæ. Et è contrario, Archiepiscopum Cantuariensem , non habere Primatum Ecclesiæ ; sed tamen esse Primatem Ecclesiæ. Igitur negat has duas consequentias à coniugatis. I. *Rex habet Primatum: Ergo Primas est.* II. *Archiepiscopus est Primas. Ergo Primatum habet.* Fortè & has negaret. I. *Sacellanus habet Episcopatum: Ergo Episcopus est.* II. *Tookerus Decanus est: Ergo Decanatum habet.*



## IV. QVÆSTIO.

*An Rex à suo Primatu possit vocari supremum  
Caput Ecclesiæ?*

I. **H**ic titulus primùm vsurpari cœpit ab Henrico Octauo , vt testantur passim authores, tam aduersarij, quàm nostri. Sic enim scribit Iacobus Thuanus lib. i. historiar. sui temporis:

*Henricus, post diuortium, se caput Ecclesie constituit. Et Polydorus Virgilius lib. 27. historiae Anglicanae: Interea, post diuortium, habetur Concilium Londini, in quo Ecclesia Anglicana formam potestatis nullis antè temporibus visam induit. Henricus enim Rex, caput ipsius Ecclesie constituitur. Et Genebrardus libro 4. Chronologiae: Henricus anno 1534. in publicis Comitibus, se caput Ecclesie Anglicanae appellauit. Et Nicolaus Sanderus in schismate Anglicano: Ex qua dicendi formula primam occasionem sumptam aiunt ut Rex supremum caput Ecclesie Anglicanae diceretur. Item: Proponebantur eis noua Comitiorum decreta, & iubebantur iureiurando affirmare, Regem supremum Ecclesie esse caput. Et Caluinus in cap. 7. Amos Propheta: Qui tantopere extulerunt Henricum Regem Angliae, certè fuerunt homines inconsiderati. Dederunt enim illi summam rerum omnium potestatem; & hoc me grauitè semper vulnerauit. Erant enim blasphemæ, cum vocarent eum summum caput Ecclesie sub Christo.*

II. Eodem titulo vsus est Edouardus Henrici filius & successor, vt patet ex Rescripto illius ad Thomam Crammerum, archiepiscopum Cantuariensem, quod sic incipit: *Edouardus, Dei gratiâ, Angliae, Francia, & Hyberniae Rex, supremum in*  
*terris*




*terris Ecclesie Anglicanae & Hybernica, tam in causis spiritalibus, quàm temporalibus, Caput, Reuerendo Thoma Cantuariensi Archiepiscopo salutem. Eundem titulum tribuit illi Crammerus in Rescripto ad Episcopos sibi subiectos, vbi sic habet: Thomas, permissione diuina, Cantuariensis Archiepiscopus, per Illustrissimum in Christo Principem Edouardum Regem Sextum, supremum in terris Caput Ecclesie Anglicanae & Hybernica, sufficienter & legitimè authorizatus, tibi Edmundo Londinensi Episcopo, & omnibus fratribus Cœpiscopis, vice & nomine Regie Maiestatis, quibus in hac parte fungimur, mandamus, ut Imagines ex Ecclesiis, cuiusq; Diœcesis tollantur. Et Nicolaus Sanderus in schismate Anglicano: Quàm primum visum est, Henrici Octauī mortem diuulgare, statim Edouardus Henrici filius, nonum ætatis annum agens, Rex Angliæ proclamatur, & summum Ecclesie Anglicanae in terris Caput, proximè secundum Christum constituitur.*

III. Elisabetha, tametsi fœmina esset, non tamen putauit, inferiorem se esse Patri & fratre, in hac re. Itaque & ipsa supremum Ecclesiæ Anglicanae Caput appellata est. Sic enim de ea scribit Iacobus Thuanus libro 15. historiarum sui temporis: *Elisabetha, recepto à Patre & fratre*

*titulo, Ecclesie Caput per Angliam cœpit appellari.*

IV. At hoc tempore, sub Iacobo, periclitatur hic titulus. Admittit quidem illum Sacellanus in Tortura Torti ; sed Tookerus & Burhillus repudiant. Verba Tookeri, quæ paulò ante citavi, sunt hæc : *Olere autem malitiam, & clamitare audaciam tuam videtur illud, cum Regem Caput Ecclesie Primatemq, confingas.* Similiter Burhillus, pagina 133. reprehendit quendam, tanquam *Petulum & Audaculum*, quod dixisset, Regem esse *Caput, Pastorem, & Primatem Episcoporum.*

V. In hoc dissidio, quid agat Rex ? Si admittit titulum *supremi Capitis Ecclesie in Anglia*, murmurabunt Tookerus & Burhillus : si respuit, quid dicet Sacellanus ? Forte sopiri hæc lis poterit, si Rex, ut Sacellano dedit Episcopatum Eliensem, ita Tookero & Burhillis duos similes largiatur. Tunc facile, ne ingrati videantur, concedent Regi hunc titulum, & multò amplior.





## V. QVÆSTIO.

*An Primatus Regis consistat  
in aliqua potestate vel iurisdictione ecclesiastica?*

I. **H**ic magnum inter Anglos dissidium est. Nec facile intelligetur, nisi præmissa distinctione. Igitur potestas Ecclesiastica triplex est, ut docent Theologi. Vna ordinis; altera iurisdictionis interioris; tertia iurisdictionis exterioris. Ad primam spectat, Sacramenta conficere & ministrare: ad secundam, regere Ecclesiam in foro conscientiae: ad tertiam, regere eandem in foro externo. Certum est, Regem, ratione Primatus, non habere potestatem ordinis. Hoc fatetur Tooke-  
rus pag. 14. cum ait: *Reges non habent potestatem administrandi Sacramenta.* Certum quoque, non habere iurisdictionem fori conscientiae. Et hoc fatetur, pag. 63. *Omnis, inquit, iurisdictionis in foro interiori, Sacerdotum est, nulla Regum.*

II. Tota controuersia est, an habeat Rex




iurisdictionem Ecclesiasticam in foro exteriori. Hic litigant Angli. Aliqui affirmant; alii negant; alii distinguunt. Affirmat Tookerus pag. 305. his verbis : *Qui habet plenissimam & amplissimam iurisdictionem in foro exteriori, potest eandem dare & auferre. Rex eam habet. Ergo potest eandem dare & auferre. Totum hoc liquet ex V. & N. Testamento.* Et Henricus Salcolbrigienſis, pag. 140. *Reges sacro oleo uncti, capaces sunt iurisdictionis spiritualis.* Et ibidem ex Legibus Anglicanis : *Rex est persona mixta, utpote, qui & Ecclesiasticam & temporalem iurisdictionem habet. & quidem supremam.* Et pag. 144. *Per leges Ecclesiasticas in hoc regno approbatas, unus Sacerdos duo beneficia habere non potest, nec Bastardus sacris initiari. Verum Rex, Ecclesiastica potestate & iurisdictione, quam habet in utroque dispensare potest.*

III. Negant Thomsonius & Burhillus. Et quidem Thomsonius, pag. 80. sic scribit : *Primatus Ecclesie non est definiendus per iurisdictionem Ecclesiasticam, sed per gubernationem supremam.* Et pagina 95. *Diximus Regem gubernare quidem Ecclesiastica sed non ecclesiastice, quia scilicet non habet iurisdictionem ecclesiasticam, sed duntaxat temporalem.* Burhillus vero, pag. 234. concedit hanc propositionem

negati-

negatiuam: *Rex nullam habet iurisdictionem ecclesiasticam, nec in foro interiori, nec in exteriori.*

I V. Distinguit Episcopus Eliensis, apud Tookerum, pag. 305. his verbis: *Habet Rex omnem iurisdictionem spirituales in foro exteriori, exceptis quibusdam censuris.* Igitur ad hanc questionem, an Rex, quatenus est Primas seu caput Ecclesiæ, habeat aliquam iurisdictionem Ecclesiasticam seu spirituales fori exterioris, sic respondendum est. Primò, cum Tookero & Salcolbrigienfi: *Habet amplissimam plenissimam, supremam.* Secundò, cum Episcopo Eliensi: *Habet aliquam, non omnem.* Tertiò, cum Burhillo & Thomsonio: *Nullam, nullam penitus habet.*



## VI. QVÆSTIO.

*An Rex propria auctoritate possit Synodos indicare?*

- I. **S** Equitur dissidium de officiis Primatus Regij. Sunt autem sex officia, de quibus disputari potest.
- B 5
- Primum,

Primum, indictio Synodorum. Secundum, sanctio legum ecclesiasticarum. Tertium, collatio beneficiorum. Quartum, creatio & depositio Episcoporum. Quintum, excommunicatio. Sextum, controuersiarum decisio. Est ergo quæstio, an hæc officia pertineant ad Primatum Regis? Dicam de singulis ordine.

II. Primò quæritur, An Rex, ratione sui Primatus, possit propria authoritate conuocare Synodos, & in iis præsidere? Hoc certò persuasum fuit tempore Henrici, Edouardi, & Elisabethæ. Nunc, sub Iacobo, controuertitur. Affirmat Salcolbrigensis, pag. 121. his verbis: *Christiani Principes in regnis suis cum laude, propria authoritate Synodos conuocarunt, constitutiones condiderunt, causas audierunt & cognouerunt.* Et pag. 146. *Rex Angliæ potest Synodos indicere omnium Ordinum æcumenicas, & in iisdem præsidere.* Et pag. 155. *Reges Angliæ suprema sua authoritate, de iure, Synodos conuocarunt.*

III. Tookerus in hoc puncto varius est, & nunc sibi ipsi, nunc aliis contradicit. Hoc patet ex variis eius testimoniis. Primum habetur, pag. 37. ubi sic ait: *A quibus magis æquum est indici Concilia, quam ab illis, penes quos semper fuit authoritas ea congregandi? Cum autem communiter tri-*  
plex



plex poni soleat Concilium, Generale, Prouinciale, & Diœcesanum; Concilium generale solius Papæ iussu celebrari vultis. Sed neque illud, nisi ab Imperatoribus & Regibus simul consentientibus, hodie indici debet: Prouinciale à Metropolitano, cum suis Suffraganeis: Diœcesanum ab Episcopo, cum Curatis, Rectoribus & Clericis Diœceseos. Ex hoc testimonio colligitur, Regem Angliæ, nullum Concilium, propria authoritate, posse indicere. Non Generale, quia hoc pertinet ad communem consensum Regum & Imperatorum. Nec Prouinciale, quia hoc pertinet ad Metropolitanum. Nec Diœcesanum, quia hoc pertinet ad Episcopum. Quid ergo reliquum est Regi?


IV. Alterum habetur pag. 41. his verbis: *Abundè liquet ex Conciliis ipsis & historia Ecclesiastica, Prouincialia Concilia & Nationalia ab Imperatoribus ac Regibus fuisse congregata.* Hoc planè pugnat cum præcedente. Ibi asseritur, Concilia Prouincialia indici à Metropolitanis: hic, à Regibus & Imperatoribus. Ibi, distinguitur triplex tantum Concilium, Generale, Prouinciale, Diœcesanum: hic, additur quartum, Nationale.

V. Tertium habetur, pagina 42. ubi proponit hanc quæstionem: *Quo igitur iure*

*iur iure tantam sibi potestatem arrogat Pontifex solus? Num diuino? Et paulò post subdit: Erat Apostolorum omnium, non unius tantummodo, & indicere Concilium, & statuere cum verborum solennitate; Visam est Spiritui sancto, & nobis. Quasi dicat; Iure diuino, non solus Petrus, sed omnes Apostoli, pari potestate, indixerunt Concilium Hierosolymitanum, & sancierunt legem de sanguine & suffocato: Ergo similiter, iure diuino, non solus Pontifex, sed omnes Episcopi, pari potestate, debent indicere Concilium, & sancire leges Ecclesiasticas. Sanè, si ita est, omninò sequitur, potestatem indicendi Concilia, non ad Reges & Principes sæculares; sed ad Apostolos & eorum successores, iure diuino pertinere.*

VI. Quartum habetur, pag. 63. vbi ait: *Mixtum autem ius, & ressaltans ex utroq, & iure Regio & Episcopali, est legum sanctio, & Synodorum indictio, & presidendi in iis prerogativa, & controuersiarum decisio, aliorumq, actuum, qui his finitimi sunt, exercitium: quæ ferè ab origine Primatus Regii descendunt, & communicantur Sacerdotibus. Hoc iterum pugnat cum præcedente. Ibi dicitur, indictionem Synodorum, iure diuino, ad Apostolos pertinere: Hic dicitur primariò pertinere ad Reges, & ab*

& ab illis ad Episcopos deriuari. Hæc non cohærent.



## VII. QVÆSTIO.

*An Rex possit leges Ecclesiasticas condere?*

I. **C**onstat, Henricum Octauum, tum per se, tum per Vicarium suum generalem, id fecisse. De Henrico sic scribit Sanderus in Schismate Anglicano: *His diebus, vigilantissimus hic Ecclesie Pastor Henricus, quo in posterum sciretur, quæ cui ritè nupta esset, legem ediderat perpetuam de nuptiis, Comitiorum etiam auctoritate firmatam, quæ statuabatur, ut si quæ personæ in Leuitico non prohibita, solo consensu, per verba de presenti, matrimonium, nulla carnis copula subsequuta, contraxerint; eæ verò ambæ postea, vel earum altera, nuptiis cum altera persona in Leuitico non prohibita contractis, carnali copula easdem consummauerint; hæc posteriores, quas firmasset copula, non priores illæ, quæ solus consensus statuisset, ratæ atque legitimæ haberentur: adeo, ut cum olim iuris gen-*  
tium



*tium* fuisset regula, Nuptias non concubitus, sed consensus facit; *am* deinceps *Henrici* regula esse cœperit, Nuptias non consensus, sed concubitus facit. *Et tamen* ipse legislator, contra suam ipsius regulam, uxorem *Annam Cluensem*, cuius nuptias, non solo consensu, sed septem etiam mensum concubitu firmauerat, eo solum pretextu reiecit, ipsaq; uiuente aliam superinduxit, quod alteri, nescio cui, consensum antea præbuisse fingeretur. *Huius* ergo legis tantopere postea puduit ipsas *Protestantes*, ut mortuo *Henrico*, eam ipsi reuocauerint, atq; irritam fecerint.


II. De Vicario autem generali, sic habet: *Septembri* mense, authoritate sua *vicaria*, *Canones* quosdam ecclesiasticos, quos *Iniunctiones* vocabat, sigillo *Vicariatus* sui munitos, *Archiepiscopis*, *Episcopis*, *Abbatibus*, & reliquo Clero præscripsit, in quibus, præter cetera, iubebantur *Parochi* sub grauissimis pœnis, ut orationem dominicam cum salutatione *Angelica*, *Symbolum* item fidei, & decem decalogi præcepta, aliq; huiusmodi, *Anglicè* in posterum in *Ecclesiis* docerent.

III. *Angli*, qui hoc tempore scribunt de *Primatu* *Regio*, non consentiunt in hoc puncto. Nam aliqui dicunt, sanctionem legum *Ecclesiasticarum*, iure diuino, pertinere

tinere ad Episcopos ; alij ad Reges & Imperatores. Priorem partem docet Tookerus , pagina 42. vbi ait , Apostolos in Concilio Hierosolymitano sanciuisse hanc legem Ecclesiasticam : *Visum est Spiritui sancto & nobis , nihil ultra imponere vobis oneris , nisi hec necessaria , ut abstineatis vos ab immolatis simulachrorum , & sanguine , & suffocato.* Et hoc fecisse eos iure diuino. Posteriorem docet Thomsonius , pag. 80. vbi dicit , Episcopos & Concilia non posse condere vllam legem Ecclesiasticam , quæ habeat vim legis , nisi accedente auctoritate Regis vel Imperatoris. Verba eius sunt hæc : *Decreta Conciliorum & Patrum Ecclesiasticis censuris , & emptionis tantum stetissent , nisi legum vim Cæsareæ aura ipsis afflasset.*

IV. Hic jam patet dissidium. Nam illa lex Ecclesiastica , quam Apostoli condiderunt , habuit sine dubio vim legis. Hoc enim colligitur ex illis verbis : *Visum est , nihil ultra imponere vobis oneris , nisi hec necessaria.* Hanc autem vim non habuit ab afflatu auræ Cæsareæ , quia neque Tiberius , neque Pilatus , neque Herodes , neque vllus alius Princeps sæcularis , qui tunc vixerit , afflauit illi vim legis ; sed habuit ab ipsis Apostolis.

Apostolis. Ipsi enim autoritate & potestate Apostolica, quam à Christo acceperant, legem illam sanxerunt & promulgarunt. Eandem potestatem nunc habent Episcopi, non Reges aut Imperatores.



# VIII. QVÆSTIO.

*An Rex propria authoritate possit conferre beneficia ecclesiastica?*


I. **A**ffirmat Henricus Salcolbrigien-  
fis, pag. 121. his verbis: *Christiani*  
*Principes in suis regnis, cum lau-*  
*de, propria authoritate, beneficia contule-*  
*runt.* Et pag. 150. *Audin Jesuita, non modò*  
*collationes beneficiorum ad Angliæ Reges*  
*spectare, sed ad eosdem illos spectare, uti Ec-*  
*clesiæ Anglicanæ Primates, vel supremos Or-*  
*dinarios?* Et pag. 142. *Rex ratione supre-*  
*mæ suæ Ecclesiasticæ iurisdictionis, presenta-*  
*bit ad liberas Capellas.*

II. Negat Tookerus, pag. 36. ubi de Re-  
gibus Angliæ sic loquitur: *Beneficia autem*  
*curata, vel non curata, non conferunt omni-*  
*nò in,*



nò in quempiam, maiora minorave: multò minus dignitates ecclesiasticas, siue Episcopatus, siue Archiepiscopatus, per univ-  
ersum ambitum regni sui. Eorum certè collatio vel institutio est, quorum est destitutio, id est, Episcoporum comprovincialium, qui potestatem habent personas ipsas sacrandi. Hoc habet iuris Regia Maiestas, quod minor & subordinata potestas habet; ius, inquam, nominandi & presentandi apud nos.

III. En triplex dissidium inter hos duos authores, & quidem in re quotidiana & vulgari. Primum est; Henricus dicit, collationem beneficiorum spectare ad Reges Angliæ, quatenus sunt Primates Ecclesiæ Anglicanæ: Tookerus contra, non ad Reges, sed ad Episcopos pertinere. Alterum; Henricus dicit, Reges propria autoritate sæpè contulisse beneficia: Tookerus, nunquam conferre aut contulisse. Tertium; Henricus dicit, Reges, ratione supremæ iurisdictionis Ecclesiasticæ, præsentare ad beneficia: Tookerus, Reges in hac re non habere plus iuris, quàm subditos & inferiores. Hoc, inquit, iuris habet Regia maiestas, quod minor & subordinata potestas habet. Vtri credat Rex Iacobus, si pingue beneficium, aut Archiepiscopatus conferendus sit?



## IX. QVÆSTIO.

*An Rex possit Episcopos creare & deponere?*


I. **A**ffirmat Henricus Salcolbrigien-  
 sis. pag. 121. *Christiani*, inquit,  
*Principes in suis regnis, cum lau-*  
*de, propria auctoritate, Episcopos crearunt*  
*& deposuerunt.* Et pag. 144. *Rex Anglia*  
*Archidiacono Richmundie Episcopalem*  
*concessit iurisdictionem.* Et pag. 155. *Reges*  
*Anglia, suprema sua auctoritate, de iure,*  
*atque cum laude omnium ordinum, Episco-*  
*pos elegerunt, ac proinde deponere potue-*  
*runt.* Et pag. 167. *Constat Christianos*  
*Principes cum laude Episcopos elegisse &*  
*deposuisse, etiam Romanos.*

II. Negat Tookerus, loco citato. Ibi  
 enim duo requirit, ad constituendum seu  
 creandum Episcopum. I. Consecratio-  
 nem personæ. II. Episcopatum. Addit,  
 Regem neutrum præstare posse. Nec e-  
 nim posse conferre vlla beneficia, multò  
 minus Episcopatum aut Archiepiscopa-  
 tum: nec habere potestatem sacrandi  
 personas. Vnde etiam alibi fatetur, tan-  
 tum

tum abesse, ut Rex Iacobus possit Episcopos creare & deponere; ut potius agnoscat se illorum alumnus & Discipulus. Sic enim scribit pagina 311. *Serenissimus ac pientissimus Rex noster Iacobus non habet quicquam antiquius & honorificentius, quam ut cum Valentiniano filium se Ecclesie profiteatur, & cum Theodorico Italiae Rege, se alumnus Ecclesie, & Discipulus Archiepiscoporum suorum & Episcoporum, libenter recognoscit.*

III. Hoc dissidium magni momenti est. Nam si Rex non potest creare seu constituere Episcopos, ut ait Tookerus; planè sequitur, Thomam Crammerum, qui à Rege creatus est Archiepiscopus Cantuariensis, non fuisse verum, sed falsum Episcopum: non Pastorem, sed prædonem: non per ostium intrasse in ouile ouium, sed aliundè ascendisse. Ex quo rursum tria sequuntur. I. Omnes alios Episcopos, qui postea, vel à Crammero, vel à Rege creati sunt, fuisse similes Crammero. II. Quidquid ab iis, autoritate & iurisdictione Episcopali factum est; nullius roboris & momenti esse. III. Eosdem teneri ad restitutionem omnium prouentuum, quos ratione Episcopatuum acceperunt. Quid hic consilii capiendum? Videant Academici.





## X. QVÆSTIO.

*An Rex possit subditos con-  
tumaces excommu-  
nicare?*

I. **H**ic Angli redigunt Regem suum ad communem ordinem : Et quæ prius illi concesserant , videntur hîc reuocare. Aiunt, Regem non posse quenquam suorum subditorum excommunicare ; posse tamen ab iis excommunicari, & ex Ecclesia Anglicana, cuius supremum caput est, expelli. Priorem partem tradit Tookerus, pag. 15. his verbis : *Rex non habet potestatem distringendi gladium spiritualem, vel quempiam excommunicandi.* Et Sacellanus pag. 151. *Nos Principi censura potestatem non facimus.* Et Thomisonius, pag. 83. *Excommunicare nullo modo ad Suprematum Ecclesia pertinet.* Et pag. 84. *Omnes fatemur, Regem excommunicandi potestatem nullam habere.*

II. Posteriores tradit Burhillus , pag. 137. cùm ait : *Quod Ambrosio licuit in Theodosium, idem & aliis in Regem, simili de causa*

*causa, liceat, id est, sicut Ambrosio Episcopo licuit excommunicare Theodosium Imperatorem, ita & nostris Episcopis licet excommunicare Jacobum Regem, si similiter peccet. Et pag. 242. Supremus Ecclesia gubernator, nempe Rex, potest eiici ex Ecclesia. Et pag. 267. Rex, etsi iustissime excommunicatus, non amittit Primatum.*

III. Non video, quomodo hæc cohæreant cum iis, quæ hactenus tributa sunt Regi. Tributum illi est, quod sit Primas, & supremum caput Ecclesiæ Anglicanæ; quod sit supra omnes personas, tam ecclesiasticas, quàm laicas, in suo regno; quod habeat supremam, amplissimam & plenissimam iurisdictionem ecclesiasticam, non minus quàm politicam & temporalem. Et tamen cum tantus sit, non potest quenquam suorum subditorum, nec laicum, nec Ecclesiasticum, quantumvis rebellem & contumacem, excommunicare? Imò, cum tantus sit, potest à suis subditis excommunicari, & eiici ex Ecclesia Anglicana, cuius supremum caput est? Non capio hoc mysterium.

IV. Addam tria argumenta, quæ augebunt difficultatem. Primum est; Qui habet supremam, amplissimam & plenissimam iurisdictionem ecclesiasticam in aliquo regno, potest exercere omnes actus,

qui pertinent ad iurisdictionem ecclesiasticam illius regni; sed Rex habet supremam, amplissimam & plenissimam iurisdictionem ecclesiasticam in regno Angliæ, vt fatentur Tookerus & Salcolbrigienfis. Ergo potest exercere omnes actus pertinentes ad iurisdictionem Ecclesiasticam regni Angliæ. Ergo etiam potest excommunicare. Nam excommunicatio, quæ per sententiam fit, ecclesiasticæ iurisdictionis actus est. Vel contra, si vis: Qui non potest exercere omnes actus ecclesiasticæ iurisdictionis in aliquo regno, non habet supremam, amplissimam & plenissimam iurisdictionem ecclesiasticam in illo regno; sed Rex Angliæ non potest exercere omnes actus ecclesiasticæ iurisdictionis in suo regno, quia non potest quenquam excommunicare. Ergo non habet supremam, amplissimam & plenissimam iurisdictionem Ecclesiasticam in suo regno.


V. Alterum est; Qui alteri dat potestatem excommunicandi, is sine dubio habet potestatem excommunicandi, quia nemo potest alteri dare, quod ipse non habet: sed Rex Angliæ dat Episcopis potestatem excommunicandi. Ergo ipse habet potestatem excommunicandi. Minor probatur ex Tookero, pagina 304. vbi fatetur, Episcopos omnem iurisdictionem



tionem Ecclesiasticam fori exterioris accipere à Rege. At potestas excommunicandi pertinet ad iurisdictionem fori exterioris, vt expressè docet Sacellanus pagina 41. & Tookerus pagina 205. cum ait: *Rex habet omnem iurisdictionem spirituales in foro exteriori, exceptis quibusdam censuris.* Excipit autem excommunicationem. Vbi iterum notanda est contradictio Tookeri. Nam censuras, inter quas est Excommunicatio, refert ad iurisdictionem fori exterioris. Rectè quidem. Sed duo addit, quæ pugnant. I. Regem dare Episcopis omnem iurisdictionem fori exterioris. II. Regem non habere omnem iurisdictionem fori exterioris.

VI. Tertium est; Qui alicui alteri subiectus est in iurisdictione ecclesiastica fori exterioris, non habet supremam, plenissimam, & amplissimam iurisdictionem ecclesiasticam fori exterioris, sed Rex alicui alteri, nempe Episcopo subiectus est in iurisdictione ecclesiastica fori exterioris, quia potest ab eo per sententiam excommunicari, & ex Ecclesia eiici, vt fatetur Burhillus: Ergo non habet supremam, plenissimam, & amplissimam iurisdictionem ecclesiasticam fori exterioris. Vel, si mauis, contra. Qui nulli alteri subiectus est in iurisdictione

ne ecclesiastica, non potest ab vlllo per sententiam excommunicari: sed Rex, si habet supremam iurisdictionem ecclesiasticam, nulli alteri subiectus est in iurisdictione ecclesiastica: Ergo non potest ab vlllo per sententiam excommunicari. Aduertis, opinor, hæc non coherere.



# XI. QVÆSTIO.

## *An Rex sit iudex omnium controuersiarum in Ec- clesia?*

I. **C**ontrouersia, quæ oriuntur in Ecclesia, sunt duplices: alia circa fidem & religionem; alia circa res alias ecclesiasticas. Est ergo prior quæstio, an Rex, ratione sui Primatus, sit supremus iudex omnium controuersiarum, quæ pertinent ad fidem & religionem? Affirmat Henricus Salcolbrigienſis, pag. 163. his verbis: *Sic luce clariuſ est, Christianos Principes, cum laude, controuersias fidei diiudicasse & diremiſſe, etiam in vniuerſalibus oſto Conciliis, id est, Niceno I. Constanti-*  
nopo-

nopolitano I. Ephesino, Chalcedonensi, Constantinopolitano II. Constantinopolitano III. Niceno II. Constantinopolitano IV. in quibus variæ controuersiæ fidei diiudicatæ & diremptæ sunt; præsertim de diuinitate Christi, contra Arium; de diuinitate Spiritus sancti, cōtra Macedonium; de vna Christi persona, contra Nestorium; de duabus in Christo naturis, contra Eutychen & Dioscorum; & sic deinceps. Has omnes controuersias, ait Salcolbrigienfis, ab Imperatoribus & Principibus sæcularibus diiudicatas ac diremptas esse.

II. Contrarium asserit Tookerus, qui nullo modo vult Reges aut Imperatores esse iudices controuersiarū fidei. Sicenim habet pag. 3. *Olere autem malitiam ac clamitare audaciam tuam illud videtur, cum Regem caput Ecclesie Primatemq̃, consingas, omniumq̃ causarum & controuersiarum, quæ ad fidem & religionem pertinent, Indicem tribuas.* Et pag. 50. *Rex in suo regno, omnibus superior sit, nulli subditus: Fidei index ne appelletur quidem.* Et pag. 313. *Reges Christiani non sunt fidei ac religionis indices.*

III. Igitur, si in Anglia oriretur dissensio de aliquo puncto fidei ac religionis, vt v.g. de reali præsentia Christi in Eucharistia; quid facerent Academici? quid ciues, quid



reliqui subditi? An adirent Regem, tanquam iudicem, & ab eo sententiam peterent? Non faceret Tookerus. An aliū iudicem postularent? At aliū non ferret Salcolbrigienſis. Quid ergo futurum eſſet? Id planè, quod hætenus factum eſt in diſſenſione de Primatu Regio. Semper litigant Angli de hoc Primatu: nunquam finire ſis poteſt. Quid cauſæ? quia diuerſi diuerſa ſentiunt, & certum iudicem, qui litem dirimat, reperire non poſſunt; vel potius, non volunt. Hæ hæreticorum proprietas eſt.

IV. Poſterior quæſtio; An Rex ſit iudex omnium controuerſiarum, quæ alias res Eccleſiaſticas concernunt? Affirmat Salcolbrigienſis, pag. 165. cū ait: *Audin controuerſias Episcopales ab Imperatore diremptas?* Quid ſentiat Tookerus, non ſatis conſtat. Aliquando videtur affirmare, vt pag. 24. *Nemini, inquit, dubium eſt, quin in primitiua Eccleſia, de rebus & perſonis eccleſiaſticis, ius dicerent Imperatores.* At pag. 23. videtur negare: *Non eſt Princeps, inquit, ſupra res, ſed ſupra perſonas.* Et pag. 49. *Rex in ſuo regno ſupremus eſt, non ſupra res, ſed ſupra homines. Vbique diſſidium.*



## XII. QVÆSTIO.

*Vnde, & quo titulo; Rex habeat Primatum in Ecclesia?*

I. **S**ensus est, an Rex ex eo præcisè, quia Rex est, an ex eo potius, quia Rex Christianus est, habeat Primatum Ecclesiæ? Priorem partem videtur amplecti Thomasonius, pag. 78. cum ait: Omnes Principes, etiam Pagani, obiectivè habent supremam potestatem in omnes omnino personas suorum subditorum, & generatim in res ipsas, siue civiles sint, siue sacre, ut in cultu divino & religione procuranda, saltem quoad modum & exercitium. Et pag. 94. Primatus est Regium bonum, quod censurâ tolli non potest. Nec est absurdum, Regem velut ethnicum, esse Primatem Ecclesiæ. Et ibidem: Rex ethnicus, cum CHRISTO initiatur, non acquirit Primatum de novo. Cui consentit Burhillus, pagina 251. Rex, inquit, titulo Regis temporalis, potest sibi vindicare & asser-

*& assumere Primatum Ecclesiæ. Et pag. 267. Rex, etsi iustissime excommunicatus, non amittit Primatum in rebus ecclesiasticis.*

II, Cōtrarium docet Sacellanus in Tortura Torti, pag. 39. vbi asserit, Primatum Ecclesiæ conuenire Regi, non quia Rex, sed quia Rex Christianus est; ideoque Reges ethnicos non habere Primatum Ecclesiæ, quamdiu ethnici sunt, sed eum accipere, quando fiunt Christiani; & rursum amittere, quādo excommunicantur. Verba eius sunt hæc: *An non Regi ethnico prestare fidem fas? Imò nefas non prestare. In ethnico enim est vera potestas temporalis, idq<sub>3</sub> sine ordine ad potestatem ecclesiasticam.* Et paulò post: *Rex quiuis, cū de ethnico Christianus fit, non perdit terrenum ius, sed acquirit ius nouum. Itidem, cū de Christiano fit sicut ethnicus, vigore sententiæ amittit nouum ius, quod acquisiuerat, sed retinet terrenum ius in temporalibus, quod fuerat illi proprium, priusquam Christianus fieret.*

III. Ex sententia Thomsonii & Burhilli sequitur, omnes Reges, siue Christiani, siue Ethnici, siue cuiuscunque sectæ ac religionis sint, habere Primatum Ecclesiæ in suis regnis. Igitur, omnes Anglos & Scotos, qui viuunt Constantinopoli, subiectos esse Imperatori Turcarum in rebus Ecclesiasticis;



sticis; qui in Hispania, subiectos esse Philippo Regi; qui Romæ, Pontifici; & sic deinceps, Quid ergo facient, si Turcarum Imperator iubeat eos Alcoranum sequi; si Rex Hispaniæ, ad Missam audiendam adigat; si Pontifex ad orandum pro defunctis hortetur; si Rex gentilis ad idololatriam impellat? An parebunt imperio? At contra conscientiam facerent. An non parebunt? Sic actum est de Primatu Ecclesiæ. Dicent fortè, se parituros, ubi visum est. Ergone subditi erunt iudices suorum Regum? Ergone Catholici in Anglia poterunt usurpare hanc vocem: *Audi Rex.* in hoc puncto visum est parere tuo imperio, in isto non est?



## XIII. QVÆSTIO.

*An Rex possit cogere suos subditos ad iuramentum Primatus?*

I. **H**Actenus actum est de dissidio Anglorum circa naturam, officia, & originem Primatus Regii, Nunc superest quæstio practica, quæ proximè

ximè conscientiam attingit , an scilicet Rex possit cogere suos subditos , vt sub iuramento affirmant , se agnoscere Primatum Regium, de quo dictum est? Vel, se agnoscere Regem, tanquam Primatem & supremum caput Ecclesiæ Anglicanæ, cui tanquam Primati & supremo capiti velint fidelitatem polliceri, non minus in rebus ecclesiasticis & spiritualibus, quàm in politicis & temporalibus. Habet autem duo puncta hæc quaestio. Vnum est, an Rex Angliæ de facto exigat, vel exegerit tale iuramentum à subditis? Alterum, an si exigat, subditi in conscientia teneantur illud præstare? De utroque seorsim dicam.

### PRIVS PUNCTVM.

II. Igitur prius punctum est , an Rex Angliæ exigat vel aliquando exegerit tale iuramentum à suis subditis? Constat, Henricum Octauum exegisse. Sic enim scribit Nicolaus Sanderus in Schismate Anglicano: *Laurentius Cochus, Prior Cœnobii Duncastrensis, vnà cum tribus Monachis, & duobus Laicis, Ægidio Horno, & Clemente Philpotto. quod nollent Ecclesiasticum terreni Regis Primum iuratum confiteri, exclusi è terris, ad cœlestem æterni Regis gloriam transmissi sunt.* Et iterum:

rum: Proponebantur eis noua Comitiorum decreta & iubebantur iurciurando affirmare, Regem Ecclesie supremum esse Caput.

III. Henricum imitata est Elisabetha; parentem filia. Et quidem formula iuramenti, quod exegit, est huiusmodi: *Ego A. B. prorsus testificor & declaro in conscientia mea, Reginam esse solam supremam gubernatricem, & istius Regni Angliae, & aliorum omnium suae Maiestatis dominiorum & regionum, non minus in omnibus spiritualibus atque Ecclesiasticis rebus vel causis, quam temporalibus; & quod nemo externus Princeps, persona, Prelatus, status, vel Potentatus, aut facto aut iure habet aliquam iurisdictionem, potestatem, superioritatem, præminentiam, vel authoritatem ecclesiasticam aut spiritualem in hoc regno. Ideoq; planè renuntio & repudio omnes forinsecas iurisdictiones, potestates, superioritates atque anthoritates.*

IV. Idem nunc facit Iacobus Rex, qui nō vno tantum, sed duplici iuramento obstringit suos subditos: altero Primatus; altero fidelitatis. Prius sic incipit: *Ego A. B. palam testor, & ex conscientia mea declaro, quod Maiestas Regia, unicus est supremus Gubernator huius Regni, omniumq; aliorum suae Maiestatis dominiorum & territoriorū, tam in omnibus spiritualibus sine Ecclesiasticis*



*sticis rebus & causis, quàm in temporalibus: Et quod nullus extraneus Princeps, persona, Prælatus, status aut Potèntatus, habet aut habere debet ullam iurisdictionem, potestatem, superioritatem, præminentiam vel auctoritatem Ecclesiasticam siue spirituales intra hoc regnum &c. Posterius sic incipit: Ego A. B. verè & sincerè agnosco, profiteor, testificor, & declaro in conscientia mea, coram Deo & Mundo, quod supremus Dominus noster Rex Jacobus &c,*

V. Hoc vtrumque iuramentum integrè habetur in Apologia Regis: Et in vtroque exigitur à subditis, vt palam profiteantur & agnoscant, Regem Iacobum esse supremum gubernatorem ac Dominum totius Angliæ, non solùm in rebus politicis ac temporalibus, sed etiam in ecclesiasticis & spiritualibus: Et quod nec Papa, nec quis alius extraneus habeat ullam potestatem aut iurisdictionem in Ecclesia Anglicana. Porro prius iuramentum primò introductum est ab Henrico Octauo, vt fateatur Iacobus in Apologia, his verbis: *Sub Henrico Octauo primum introductum est iuramentum Primatus, sub eoq<sup>3</sup> Thomas Morus & Rossensis supplicio affecti; idq<sup>3</sup> partim ob eam causam, quod iuramentum illud recusarent. Ab eo d<sup>3</sup> princeps omnes mei decessores, quotquot sunt hanc religionem amplexi*

*amplexi, idem sibi, aut non multò secus asseruerunt.* Posterius à Iacobo excogitatum est.

*ALTERVM PVN-*  
*ctum.*

VI. Est ergo quæstio, an omnes subditi, qui in Anglia sunt, teneantur in conscientia præstare vtrumque hoc iuramentum, quotiescunque Rex illud exigit? an potius debeant carceres, tormenta, & mortem ipsam sustinere, quàm id præstent? Catholici nihil dubitant de priori. Certum fixumque illis est, vitam potius amittere cum gloriosissimis Martyribus, Thomà Moro & Episcopo Rossensi, quàm Primatum Regium astruere; & Pontificium abjurare. De posteriori, ante paucos annos, non nihil dubitatum est. Nam aliqui ex Catholicis, quia non satis videbant vim & scopum illius iuramenti, aliquantisper hæsitaverunt, an saluâ conscientia iurare possent, nec ne. Quæ tamen dubitatio non diu duravit, sed confestim à Paulo V. Pontifice Maximo, & Cardinali Bellarmino sublata est. Nam Pontifex misit duo Breuia Apostolica ad Catholicos in Angliam; & Bellarminus scripsit Epistolam ad Blæuellum Archipresbyterum de hac ipsa re. Vterque negat, saluâ conscientia, id fieri posse.

D

posse. Et ratio illorum est, quia nemo, saluâ conscientiâ, potest abnegare fidem Catholicam: sed qui præstaret iuramentum à Rege propositum, abnegaret fidem Catholicam, non quidem generatim, sed tamen quoad aliquem eius articulum; Ergo nemo, saluâ conscientia, præstare potest hoc iuramentum.

VII. Hanc rationem, quæ sanè optima est, admittunt Catholici; non idem Adversarij. Ego, in gratiam Catholicorum, qui in Anglia sunt, statui duas alias adferre, præsertim contra iuramentum Primatus, quæ ne ab adversariis quidem repudiari poterunt. Prima est hæc; Nemo in conscientia tenetur affirmare sub iuramento, quod vel apertè falsum, vel certè dubium est: At, quod Rex sit Primas & supremum Caput Ecclesiæ, cui non solum in temporalibus, sed etiam in ecclesiasticis parendum sit, vel apertè falsum, vel certè dubium est. Ergo nemo in conscientia tenetur hoc affirmare sub iuramento. Maior per se nota est, quia ne affirmare quidem licet, quod vel falsum, vel dubium est; multò minus, sub iuramento affirmare. Minor probatur, quia tam apud Calvinistas, quàm apud Catholicos, apertè falsum censetur, quòd Rex sit Primas & supremum Caput Ecclesiæ. Apud Anglos  
verò,



verò, qui Regi adhærent, in dubiū vocatur. Nam ex illis, alii affirmant, alii negant hæc puncta, quæ sequuntur. 1. *Rex est Primas Ecclesiæ.* 2. *Rex est supremum Caput Ecclesiæ.* 3. *Rex habet Primatum Ecclesiasticum.* 4. *Rex habet potestatem & iurisdictionem ecclesiasticam.* 5. *Rex potest propria auctoritate conuocare Synodos, & in iis præsidere.* 6. *Potest conferre beneficia ecclesiastica.* 7. *Potest creare & deponere Episcopos.* 8. *Est iudex controuersiarum fidei.* Sanè, si hæc & similia puncta, apud ipsos Anglos, qui Regi fauēt, incerta sunt, cum ab aliis negentur, ab aliis affirmantur; totum Primatum incertum esse, necesse est. Quæ ergo temeritas & imprudentia est, obligare velle Catholicos in conscientia, vt iurati affirment id, quod ipsi falsum, alii dubium esse censent?

VIII. Articulatiùs dicam, quod dixi. Iuramentum Primatus Regii continet tot partes, quot sunt, vel putantur esse officia Primatus Regij. Sunt autem, vel putantur esse varia officia, vt supra visum est, nempe, conuocare Synodos, sancire leges Ecclesiasticas, conferre beneficia, creare Episcopos, fidei controuersias dirimere. Igitur, variæ sunt partes iuramenti Primatus Regij. Ex illis, hanc vnā seosfirm accipiamus: *Ego A. B. in conscientia mea iuro, me*

*fidelem & obsequentem fore Regi, quotiescunque propria auctoritate creabit Episcopos, quos vult, & deponet ab officio, quos vult.* Si hæc pars exigatur ab omnibus, qui in Anglia sunt, quid futurum putamus? An omnes, etiam illi, qui Regi adhærent, iuraturi sunt? Faciant, qui volent; Tooke-  
rus, certè, si vir constans est, facturum non est. Negat enim creationem & depositionem Episcoporum ad Regem pertinere. Et si is facturum nō est, qui alioqui agnoscit Primatum Regium (saltem verbo) quomodo Catholici compellentur, ut faciant, qui illum penitus ignorant? Quod dixi de hac partē, de reliquis similiter dicendum est.

IX. Altera ratio est hæc: Iacobus Rex sæpè protestatur, se non plus iuris vindicare sibi in Ecclesiam, quàm olim fecerunt Reges in veteri Testamento; ac proinde Primatum suum iisdem terminis definiri, quibus olim in veteri Testamento definiebatur. Atqui Reges in veteri Testamento non poterant subditos suos cogere ad huiusmodi iuramentum: *Ego A.B. palam testor, & ex conscientia mea declaro, quod Ieroboam est unusquisque supremus Gubernator huius regni Israelitici, tam in spiritualibus, quàm in temporalibus: Et quod nullus extraneus habet aut habere debet ullam iurisdictionem*

*ditionem, potestatem, superioritatem, præ-  
eminentiam, vel auctoritatem in hoc regno.*  
Ergo nec Iacobus Rex potest cogere sub-  
ditos suos ad simile iuramentum. Maior  
patet ex Apologia Regis. Minorem sic de-  
claro. Post mortem Salamonis, regnum in  
duas partes, Deo disponente, diuisum est;  
quarum altera decem tribus, altera duas  
complectebatur. Igitur duo deinceps erant  
regna distincta; duo Reges, quorum alter  
ab altero non pendebat in regimine tem-  
porali. Alter vocabatur Rex Israel; alter  
Rex Iuda. Vterque habebat suos succes-  
sores. Primi, post diuisionem factam, fue-  
runt Ieroboam Rex Israel, & Roboam  
Rex Iuda. In vtroque regno erant Leuitæ  
& Sacerdotes. At summus Pontifex non  
poterat simul in vtroque commorari, sed  
in altero tantum, ac potissimum in regno  
Iuda. Nihilominus præerat omnibus Le-  
uitis ac Sacerdotibus, qui in vtroque re-  
gno versabantur. Nec Ieroboam poterat  
legitimè dicere suis Leuitis ac Sacerdoti-  
bus: *Nolite obtemperare summo Pontifici,  
qui habitat in regno Iuda; mihi soli obedite;  
ab illius iurisdictione & potestate exempti  
estis.* Et si dixisset, sine dubio peccasset. Si  
ergo Ieroboam Rex non potuit Leuitas &  
Sacerdotes sui regni eximere à iurisdictione  
& potestate extranei Pontificis; quo



iure id facit Iacobus Rex Angliæ? præsertim cum afferat, se non plus iuris vindicare sibi in Ecclesiam, quam Reges veteris Testamenti sibi vendicârunt.



## EPILOGVS.

I. **Q**Uæ hætenus dicta sunt, ad tria capita possunt reuocari. Primum est, Primatum Regis in Ecclesia, rem esse nouam, quæ ab Henrico Octauo primum introducta est, nec alibi hætenus, quam in regno Angliæ vsurpata. Alterum, tot esse dissensiones Anglorum circa hunc Primatum, vt, quid sit, & quam vim habeat, certò inter ipsos constare non possit. Tertium, iuramentum huius Primatus, nec exigi à Rege, nec à subditis præstari posse.

II. Hinc aliæ tres quæstiones, quæ circa subditos moueri poterant, facile dissoluentur. Sunt enim tria subditorum generain Anglia. I. Henriciani, (vt aliqui eos vocant) qui & agnoscunt, & iurant Primatum Regium. II. Puritani, seu puri Calvinistæ, qui non quidem agnoscunt, sed

sed tamen iurant. III. Catholici, qui nec agnoscunt, nec iurant.

III. Est ergo prima quæstio, quid dicendum sit de Henricianis, qui & agnoscunt, & iurant Primatum Regis? Respondeo. Illi stultè & inconsideratè agunt. Ratio est, quia, vt supra dixi, stultum ac temerarium est, rem dubiam & incertam iuramento confirmare. At Primatus Regis, res planè dubia & incerta est apud Henricianos, vt patet ex illorum dissidiis, quæ hætenus explicata sunt. Ergo eiusmodi Primatum iuramento confirmare, stultum ac temerarium est.

IV. Altera quæstio, quid dicendum de Puritanis seu puris Caluinistis, qui quidem non agnoscunt Primatum Regis, sed tamen, si iubeantur, iurant? Respondeo. Sunt periuri & politici. Ratio est, quia aliud sentiunt, aliud iuramento affirmant. Sentiunt cum Caluino, Reges & Principes sæculares non habere Primatum in rebus spiritualibus & Ecclesiasticis, sed solum in temporalibus; & tamen cum Henricianis, Regi tanquam Primati & supremo Capiti Ecclesiæ Anglicanæ, sub iuramento fidelitatem promittunt, Hoc autem faciunt ad externam pacem & politiam conseruandam, quæ pluris ab illis,

quàm fides & religio aestimatur; ideoque politici potius, quàm Christiani appellandi sunt. De quibus verè dixit Iacobus Rex, se plus fidei in efferis latronibus, quàm in isto hominum genere reperisse.

V. Tertia quæstio, quid dicendum de Catholicis, qui nec agnoscunt Primatum Regis, nec iuramento confirmant? Respondeo: Sunt homines recti, qui coram Deo ambulant in veritate: simplices, qui, quod corde sentiunt, ore profitentur: cordati, qui cum Eleazaro mori malint, quàm vel externo signo in rem illicitam consentire: similes Apostolis, qui Deo magis, quàm hominibus obedire satagunt: similes Martyribus Ecclesiæ primitivæ, qui liberè coram persecutoribus profitentur, se esse, quod sunt.

VI. At miseri sunt, inquires, Si enim recusent iuramentum, coguntur subire carceres, tormenta, supplicia. Sanè, non idèd miseri, sed beati. Sic enim docuit nos Christus in Evangelio, Matth. 5. 10. *Beati, qui persecutionem patiuntur propter iustitiam, quoniam ipsorum est regnum cælorum.* At durum est, pati. Quomodo durum, quod cum gaudio & delectatione fit? Audi, quid de Apostolis dictum sit, Actor. 5. 41. *Ibant gaudentes à conspectu Concilii, quoniam digni habiti sunt pro nomine*



*mine ꝑ su contumeliam pati. Audi, quid Apostolus de seipso dicat, 2. Corinth. 4. Superabundo gaudio in omni tribulatione nostra.*

VII. Vnde hoc gaudium? Ex duplici dono Spiritus sancti, ꝑpe & charitate. Spes futuræ gloriæ facit nos lætos & erectos in aduersitatibus. Roman. 8. 18. *Non sunt condignæ passionēs huius temporis ad futuram gloriam, quæ reuelabitur in nobis.* Et Roman. 12. 12. *Spe gaudentes, in tribulatione patientes.* Et Hebræor. 10. 34. *Rapinam bonorum vestrorum cum gaudio suscepistis, cognoscentes, vos habere meliorem & manentem substantiam. Nolite itaque amittere confidentiam vestram, quæ magnam habet remunerationem. Patientia enim vobis necessaria est, ut voluntatem Dei facientes reportetis promissionem.*

VIII. Nec minor vis charitatis. Rom. 8. 35. *Quis nos separabit à charitate Christi? tribulatio? an angustia? an fames? an nuditās? an periculum? an persecutio? an gladius? Sed in his omnibus superamus propter eum, qui dilexit nos. Certus sum enim, quia neque mors, neque vita, neque Angeli, neque Principatus, neque virtutes, neque instantia, neque futura, neque fortitudo, neque altitudo, neque profundum, neque creatura alia poterit nos separare à*

*charitate Dei, quæ est in Christo Iesu Domino nostro.*

IX. Accedunt exempla Christi & aliorum Sanctorum, quæ etiam magnam vim habent ad excitandos & corroborandos Catholicorum animos, ut libenter patiantur in hac vita carceres, vincula, tormenta, mortem ipsam. 1. Pet. 2. 20. *Si bene facientes, patienter sustinetis; hæc est gratia apud Deum. In hoc enim vocati estis: quia & Christus passus est pro nobis, vobis relinquens exemplum, ut sequamini vestigia eius: qui peccatum non fecit, nec inuentus est dolus in ore eius: qui cum malediceretur, non maledicebat: cum pateretur, non comminabatur: tradebat autem iudicanti se iniuste.*

X. Et Hebræor. 11. 36. *Alii ludibria & verbera experti, in super & vincula & carceres: lapidati sunt, scissi sunt, tentati sunt, in occisione gladii mortui sunt: circumierunt in pelotis, in pellibus caprinis, egenæ, angustiatæ, afflicti: quibus dignus non erat mundus: in solitudinibus errantes, in montibus & speluncis, & in cavernis terre.*

XI. Et iterum cap. 12. 1, *Ideo quæ & nos per patientiam curramus ad propositum nobis certamen, aspicientes in authorem fidei,*  
 & con-

Et consummatorem Iesum, qui proposito sibi gaudio, sustinuit crucem, confusione contempta, atque in dextra sedis DEI sedet. Recogitate enim eum, qui talem sustinuit à peccatoribus aduersum semetipsum contradictionem, ut ne fatigemini, animis vestris deficientes. Nondum enim usque ad sanguinem restitistis.


XII. Et 2. Corinth. II. 23. In laboribus plurimis, in carceribus abundantius, in plagis supra modum, in mortibus frequenter. A Iudæis quinquies, quadragenas unâ minus accepi. Ter virgis cæsus sum, semel lapidatus sum, ter naufragium feci, nocte & die in profundo maris fui, in itineribus sæpè, periculis fluminum, periculis latronum, periculis ex genere, periculis ex gentibus, periculis in ciuitate, periculis in solitudine, periculis in mari, periculis in falsis fratribus: in labore & ærumna, in vigiliis multis, in fame & siti, in ieiuniis multis, in frigore & nuditate.

XIII. Et rursum cap. 12. 9. Libenter gloriabor in infirmitatibus meis, ut inhabitet in me virtus Christi. Propter quod placeo mihi in infirmitatibus meis, in contumeliis, in necessitatibus, in persecutionibus, in angustiis pro Christo. Cum enim infirmor, tum potens sum.

XIV. His



XIV. His & similibus sacrarum literarum testimoniis muniti fuerunt Thomas Morus & Episcopus Rossensis, quando potius mortem oppetere, quàm impio iuramento se obstringere voluerunt: His alii, qui eos in glorioso certamine secuti sunt: His denique, qui nunc in Anglia carceres occupant, catenis alligantur, possessionibus exuuntur, suo sanguine purpurantur.



SANCTVS CYPRIANVS

Epistola 9.

*Pretiosa mors hæc est, quæ  
emit immortalitatem precio  
sanguinis sui.*

Et in fine Epistolæ.


*O beatam Ecclesiam no-  
stram, quam temporibus no-  
stris*

*stris gloriosus Martyrum,  
sanguis illustrat. Erat antea  
in operibus fratrum candida:  
nunc facta est in Martyrum  
cruore purpurea.*

Et Epistola 24.

*Quid gloriosius aut fœli-  
cius ulli hominum poterit ex  
diuina dignatione continge-  
re, quàm inter ipsos carnifices  
interritum confiteri Domi-  
num Deum? quàm inter se-  
uientia secularis potestatis  
tormenta, etiam extorto, &  
excruciato, & excarnificato  
corpore, Christum Dei filium,  
etsi recedente, sed tamen libero  
spiritu confiteri? quàm relicto  
mundo*

*mundo cœlum petisse? quàm  
desertis hominibus, inter An-  
gelos stare? quàm collegam  
passionis cum Christo, in  
Christi nomine fa-  
ctum es-  
se?*



FINIS.

W

